

INUIT ATAQATIGIIT

Inatsisartuni



UPA 2017/33
Nuuk, 03 juni 2017
Villy Olsvig

Illoqarfiup najugaqarfigisap avataanut peqqissariartorluni nakorsiartup toqukkut qimagunerani illoqarfigisaanut angerlaannerani ilaqutaasut atuligaannik qanoq iliorluni oqilisaasoqarsinnaanersoq pillugu apeqquteqaat aallaavigalugu Inatsisartut oqallinnisaannik siunnersuut.

(Inatsisartunut ilaasortaq Vivian Motzfeldt, Siumut)

Siullermik Vivian Motzfeldt oqallisissiaq aallaavigalugu siunnersuutaanut Inuit Ataqatigiinniit qujavugut.

Pingaaruteqarluinnarpoq nunatsinni isoratuumi ukiup qaammataasa ingerlaneranni ilaatigut nunaqarfiit isorliunerusormiut aammalumi illoqarfiit mikinerusuneersut inuunerup ataasinnaasup tunniunneqartup qaminneqarneranik ajornartorsiummik annertuumik eqqartorneqarnissaanut periarfissiigavit.

Ilumoorluinnarputit qulequtaq imaanaangilaq ilaqutariippassuanut atorsareersunut inuunerup nunami maani naanerani ilaqutariippassuarnut atorsaateqareerlutik qaatigut artukkersuutaasarmat piffimmi sumi toqusoormi apeqqutaalluni, kissaatiginartaraluaqaarlumi qanigisannguit najorlugit inuunerup naajartulernerani najuussinnaagaluarnerput, tamannali ilaatigut ajornartarpoq.

Assersuut maani Inatsisartut ataatsimiittarfiani katereqqavugut nalulluinnarlutigu inuuneq tamatsinnut tunniunneqarsimasutuaq qanoq uatsinnut aammalumi qanigisattinnut kinguneqartitsiumaarnersoq, taamaapportaaq aamma sineriassuatsinni isoratuumi inuunerup qanoq naggateqarumaarnissaa tamatta eqqoriarsinnaagunangilarput.

Taamatullu makku tunngaviusinnaalluarput

Qaqugu,- Sumi aammalu Qanoq, tamattalu akissutissaqartikkunngilarput tamanna.

Nunatta sineriassuani maanna peqqilluta inooqataanitsinni nalulluinnarparput ullussagut kingulliit qanoq ikkumaarsinnaanersut, ilai immaqa nappaammik aallaaveqartumik naalliullutik qimagutissapput, ilai immaqa tassangaannartumik qimagussinnaalluarput, aammali ilaqasaagut imaatigut ajunaarnermik aallaaveqartumik qimaguttunik taamaapportaarlu mi aamma ilaqassaagatta ajoraluaqisumik inuunerup maani nunap qaani tunniunneqartutuaagunartup kipitiinnarneranik.

Tamattali nalugunangilarput inoqutigiit qaningisaasut qimataasut akornanni inuup toquneranik annertuumik nunaqarfinniikkutta imaluunnit illoqarfimmiikkutta ilaqutariit qaningisaasut misiginneqatigalugit tamattata pinngittoqarnata eqqorneqartartugut.

UPA 2017-nip ingerlatilaalersimanerani maani inimi issiaqataasup ilisimatippaanga naalagiarissalluni ullorlu taanna sapaataangimmat aperivara susoqarsimanersoq, ilisi-

matippanga ilisarimasaa isorliunerusuneersoq nunaqarfimmeersoq maani Nuuk-mi eqqissimasooq taassumallu eqqiisiisimaarfissaanut inissinneqassammat najukkiartorniarluni.

Takorluulaariartigu pineqartoq maanna nunami maani inooqataanermini takorloorsimangilluinnakkamini maanna tassa inissinneqarpoq, qanigisaanik ilaqutaanik maaniit-toqangippat nunap allanngorarneri aammalumi saningasortat qalipanneqartarneri il il., qanormita ukiut arlaqangittut qaagiuppata isikkoqarsinnaajumaarsinnaaneri.

Takussutissiarilaarpakka takorluuinissinni nunami inuit peqatiginikuusimasatta ullumikkut piinsip ulluani kangillunnguaqarfimmi ilerfit marlussunnguit qassiniimmitaava ilusai, marlunnguullutik nunataa nakkaassimapput aappaata siningasortannua sangoriivissimavoq.



Inuit Ataqtigiinniit sineriassuattinni illerfissarsiuteleqatigiinni kajumissusertik aallaavigalugu tuisigut pattalaarpagut nersorlugillu suliame annertuumik suliaqarmata.

Taamaattorli soorluuna illerfissarsiutileqatigiit minnerunngitsumillu kommunit aamma suli-asaqartut inuiaqatigiinnimi toqu sukkulluunniit aqqusaarneqarsinnaasarpoq nappaammip-pat aammali tassangaannartumik pisoqarnikkut, taamaattoqartillugulu illerfissiniarniart-arneq ajornaatsuinnaangilaq, tupinnangittumillu illerfissarsiutileqatigiit pineqartoq pif-fimminni eqqissisoq illerfimmik tunisinnaaneq ilaatigut ajulersimavaat, taamaalillunilu ila-qu-tariinnut qaningisariinnut artorsareersunut suli qaatigut artorsaat nutaaq saqqummersa-raaq sanasunik pissarsinngikkaanni illerfimmik qanoq pissarsisoqarsinnaaneranik apeqqut saqqummertarpoq.

Taamaattumillu kommunini qinikkanut assut kaammattuutigerusunnarpoq misis-sorneqarsinnaanginnersoq kommunip siilami sulisuisa nakkutigisaannik illerfinnik uninngasuuteqartarsinnaanermik periarfissaqartoqarsinnaanginnersoq, taakkulu atornia-neqalernerminni illerfissarsiutileqatigiinniik pisiarineqartalerlutik.

LANDSKARSIP 2016-IMI NAATSORSUUTAI, Naatsorsuutitut nassuiaatit-ini konto pingaaneq 30-01-10 qupperneq 31 ilaatigut imatut allaaserineqarsimavoq issuaaneq "Aningaasaliissutit Pituffimmi immikkut aningaasartuutaasut akilernissaannut immikkoorti-taapput, Pituffillu tassaavoq kommunit aggornerisa avataanni inoqarfituaq. Aningaasaliis-sutit **toqukkut qimagussimasut assartornerannut siullertut atorneqarsimapput.** Taamaammata aningaasaliissutit ukiut aningaasanut inatsiseqarfiusut tamakkernagit ator-neqartarput."

LANDSKASSENS REGNSKAB 2016, Regnskabsmæssige forklaringer, hoved konto 30-01-10

”Bevillingen er afsat til dækning af særlige udgifter i Pituffik, der er det eneste beboede område udenfor kommuneinddelingen. Bevillingen er fortrinsvist **anvendt til transport af afdøde**. Bevillingen finder derfor ikke fuldt ud anvendelse i hvert finansår.”

Nunatta Naatsorsuutani innuttaaqatigut sumiikkaluarlutilluunniit toqusimasut assartorneqarsinnaaneranik taama ersariitigisumik allaqqasoqarmat kingumut aningaasanut inatsisaasarsimasut soorunalimi misissorusuttassimavakka, imatullu isikkoqarput kingumut misissuilaarninni konto pingaarneq 30-01-10

Ukioq	Aningaasaliissut
2010	56.000
2011	57.000
2012	58.000
2013	59.000
2014	60.000
2015	61.000
2016	61.000
2017	61.000

Nunatsinni inuiaqatigiit sumi inissisimani kisiisa aallaaviginagit Inuit Ataqtigiinniit kaammattuutigerusunnarpoq naalakkersuinikkut misissorneqarniarli inuk uumagallarnermi peqqissariarfianukarnermigut akiliunneqartartup taamaattorli timip nillornerata kingunerisaa ilaqtariinnut qaningisaasunut nammatassanngortinneqartarnera sukkut aaqiisuteqarfigineqarsinnaanersoq.

Siunnersuuteqartup oqallisissiaani atuarneqarsinnaavoq ilaatigut Air Greenland nunatta piginneqataaffigisaa suleqatiginiarneqarsinnaasoq, tamanna sumi najugaqarneq aallaavigissagaanni isuma ajunngeqaaq, taamaattorli aamma eqqaamassavarput piffiit ilaanni nu-naqarfinnut timmisartut atorneqartartut soorluuku tingusisinnaajumaarsinnaanerat immi-nermini killeqareersut.

Inuit Ataqtigiinniit naalakkersuisunut kissaatigissavarput ajornartorsiutit matumani eqqartorneqartut eqqumaffigilluaqqullugit, pisariaqarpat misissueqqullugit ajornartorsiutillu paasineqartut pinngitsoornagit qanoq iliuuseqarfigeqqullugit

Taamatut oqaaseqarluta qutsavigeqqissavarput siunnersuuteqartoq Vivian Motzfeldt, Si-umut Inuit Ataqtigiinniit.